

FABLE XXXVII.

UN E Vieille avoit plusieurs Servantes, qu'elle entretenoit & nourrissoit dans sa Maison ; elle les faisoit toujours lever de grand matin, au chant du Coq. Les Servantes n'estant pas contentés de se lever si matin, tuerent le Coq, afin qu'il n'evillaist plus leur Maistresse ; Mais elles furent bien trompées en leur calcul, car la bonne femme à qui le Coq servoit d'horloge, ne l'entendant plus chanter, appelloit ses Servantes deux heures plutôt qu'elle n'avoit accoustumé quand le Coq estoit en vie, tant elle craignoit qu'elles ne dormissent trop.

DISCOURS MORAL.

PLusieurs ne sçavent pas se conseiller eux mesmes, & ne veulent point croire ceux qui leur donnent bon conseil ; Mais quand ils sont au milieu du danger, alors ils commencent à devenir sages, & à blasmer leur bestise. Alors ils ont assez de Conseil : Il falloit, disent ils, faire cecy & cela. Mais il vaut beaucoup mieux estre Prometheus, qu'Epimetheus ; Le grand Mal est, que les fidelles Conseillers ne trouvent point de loy en ceux qui les consultent, quoy qu'ils leur donnent de salutaires advis : La mesme chose se void pretque tous les jours dans les Concurrences humaines, ou la Jeunesse emportée des tourbillons de son ardeur, méprise les sages enseignemens des Vieillards, & se precipite inconsiderement en mille sortes des perils causez par son incredulité. Quant à la Cause, elle provient de divers subjects, car quelque fois elle procede de nostre oysivité, ou de nostre Arrogance qui nous fait imaginer tout autre sens estre moindre que le nostre ; quelquefois aussi c'est un effet de nostre Impetuosité, qui ne nous permet pas d'ouvrir l'Oreille à ce qu'on nous dit, & entraine nostre appetit & nostre Raison. Mais l'homme prudent qui ne fait jamais rien sans advis, en tire une Resolution qui ne luy peut estre que profitable. Jupiter mesme ne fait rien sans le conseil des Dieux. Agésilais menoit cinquante Conseillers à sa Suite ; & l'Empereur Severe faisoit le mesme ; tant ils estoient persuadez qu'il ne faut jamais rien entreprendre sans Conseil, soit dans la paix soit dans la guerre.